



PRIMEIRO MINISTRO

SEMINÁRIU INTERNASIONAL HASA'E KUALIDADE ENSINU SUPERIOR NIAN NU'UDAR FATÓR-XAVE ATU AUMENTA EMPREGABILIDADE GRADUADU SIRA NIAN

Dili, loron 22 fulan-novembru tinan 2017

Diskursu husi S.E. Primeiru-Ministru, Dr. Mari Alkatiri

Importánsia husi formasaun no kapasitasaun rekursus umanus ba susesu política ekonómika nasional nian

Iha altura ne'ebé atuál Governu apresenta política estruturante atu implementa mekanizmu koerente no efikás sira ne'ebé promove dezvoltimentu ekonomia nasional iha ne'ebé instituisaun sira husi ensinu superior, setór privadu no sosiedade sivil asume responsabilidade kona-ba ninia papél atu dezempeña formasaun rekursus umanus nasional sira atubele hasa'e nivel empregu ba graduadu sira husi ensinu superior nasional. Semináriu ida-ne'e hala'o kedas iha selebrasaun Loron Mundiál Siénsia ba Pás no ba Dezenvolvimentu no iha tempu hanesan nu'udar mós Loron Nasional Ensinu Superior nian, lori fila-fali debate kona-ba importánsia husi kapasitasaun rekursus umanus ba susesu política ekonómika nasional nian.

Programa Governu Konstitusional VII nian, hanesan ida ne'ebé mak apresenta ona iha Parlamentu Nasional iha inísiu fulan-outubru liu-ba (daudaun ne'e Governu sei anota hela) estabese Edukasaun nu'udar pilár fundamental ida, tuir Planu Estratéjiku Dezenvolvimentu 2011-2030, Objetivu sira husi Dezenvolvimentu Sustentavel, Planu Estratéjiku Nasional Edukasaun 2011-2030 no mós Planu Edukasaun no Formasaun Técnica no Profisional Timor-Leste nian.

Programa Governu atuál nian identifika Edukasaun, la'o hamutuk ho saúde, pobreza, empregu, abitasaun no ordenamentu, sai nu'udar área ida husi área crítica sira seluk

husi ita-nia sosiedade no kondisaun *sine qua non* ba konsolidasaun identidade nasional no konstrusaun Timor-Leste ida ne'ebé dezvoltidu, justu no inkluzivu liután, iha ne'ebé prevalese igualdade ba oportunidade hodi fó benefísiu ba sidadaun sira hotu.

Iha tempu ida ne'ebé atual Governu prepara hela atu aposta iha agenda nasional ida kona-ba transformasaun no diversifikasaun ekonómika, iha dinámika rutura nian ida ho *status quo* no marazmu, formasaun no kapasitasaun ba ita-nia rekursus umanus mosu hanesan fatuk-inan (*pedra angular*) husi forma ida-ne'e, liuliu bainhira país ne'e iha hela prosesu preparasaun atu tama iha ASEAN ne'ebé hotu-hotu hein hela.

Ensinu superior universitariu, no, liuliu, ensin superior tékniku kaer knaar fundamental ida iha garantia ba sustentabilidade kona-ba desenvolvimentu nasional, liuhusi formasaun rekursus umanus ne'ebé kualifikadu sei hatán ho forma ne'ebé adekuada no completa ba nesesidade merkadu traballu nian ne'ebé mak aumenta ba beibeik.

Ohin loron, ita bele haree dezekilíbriu ida ne'ebé boot entre kreximentu ne'ebé maka'as tebes husi número graduadu sira iha instituisaun ensin superior sira, ne'ebé barak liu konsentra iha kapital, no ninia nivel empregu nian ne'ebé ki'ik tebetebes, no nune'e kontraria kedas ho objetivu sentral husi ensin superior, *i.e.*, forma kuadru sira ne'ebé iha kapasidade atubele tama iha setór profisional sira no atubele participa iha desenvolvimentu sosiedade timoroan nian, nu'udarhatete iha Lei Baze Edukasaun nian ne'ebé vigora hela.

Hodi rekoñese mós iha tempu hanesan ba nesesidade atu kria número empregu nian ida ne'ebé signifkativu iha setór formál atubele obsorve populasaun ativa atual (ne'ebé, tuir previzaun sei atinje 913.800 iha tinan 2023) no nesesidade atu hadi'a qualidade husi rekursus umanus iha nivel nasional, Estratéjia Nasional Empregu tinan 2017-2030 nian mai apresenta estratéjia lubuk ida ne'ebé tuirmai hanaran “kriasaun oportunidade empregu nian sira iha Timor-Leste”. Entre oportunidade sira ne'e, ida maka fortaleimentu ensin superior sira no formasaun téknika no profisional nu'udar área prioritária ba aumentu empregabilidade no produtividade husi forsa laborál Timor nian, ne'ebé prevee apoiu ba sentru formasaun sira ne'ebé maka hetan ona akreditasaun, tuir norma internasioná sira, nune'e bele premite formadu timoroan sira iha asesu ba merkadu traballu internasionál sira.

Señora no señor sira,

Hanesan identifika beibeik tiha ona dezafiu oin-oin kona-ba garantia kualidade ensinu superiór universitáriu no tékniku iha panorama nasional, liuliu, kestaun lian instrusaun nian iha ensinu superiór, número institutu superiór tékniku-profisionál nian ne'ebé ki'ik, nesidade desentralizasaun ensinu superiór nian, kualifikasaun ba ita-nia dosente universitáriu sira, relevánsia husi matéria sira ne'ebé hanorin, akreditasaun ida ne'ebé transparente no independente ba instituisaun ensinu superiór sira, no seluk tan. Maibé, aleinde identifika problema sira ne'ebé mak ita hasoru iha tinan barak nia laran, importante mós oras ne'e atu hanoin kona-ba oinsá Governu atuál bele promove medida prioritária sira ne'ebé bele ultrapasa, ho dalan ne'ebé koerente no efikás, dezafiu sira ne'ebé apresenta, hodi aliña medida sira ne'e ho interese estratéjiku no ekonómiku sira país nian.

Governu atuál hakarak elabora no aprova Política Jestaun no Organizasaun Ensinu Superiór nian ida ne'ebé bele estabelese norma sira kona-ba diversifikasaun oferta edukativa nian, kumprimentu ba kurríkulu Padraun Mínimu no Lian Ofisiál sira no prinsípiu sira kona-ba finansiamentu ensinu superiór públiku no privadu nian, naran katak, ida ikus liu ne'e bele hatán ba prioridade nasional sira, hodi halo ensinu tékniku superiór inkluzivu no asesu-belek (asesivel) liután ba ema hotu-hotu bainhira hatudu katak sira iha kapasidade, talentu no hakarak atu aprende.

Kona-ba ensinu superiór tékniku, Governu hakarak haforsa kondisaun atuál sira husi Institutu Politékniku Betanu nian no diversifika oferta liuhusi estabelesimentu Institutu Politékniku Otelaria no Turizmu nian, iha Lospalus, no Akademia Peskas no Estudu Mariñu sira, iha Manatutu.

Governu VII iha hanoin mós atu fó continuidade ba Programa atribuisaun Bolsa Estudu sira, liuhusi Fundu Dezenvolvimentu Kapitál Umanu, iha área prioritária no estratéjika sira ba dezenvolvimentu nasional, liuliu iha país sira CPLP (sigla iha lian português) no ASEAN (sigla iha lian inglés) nian, tuir prinsípiu kriteriozu sira kona-ba selesaun no insentivu ba alunu sira ne'ebé badinas no ho vontade maka'as atu aprende.

Intensaun Governu atuál nian ida mós mak atu reflète, ho forma ne'ebé klaru, preokupasaun ida ne'e iha alokasaun anuál fundu públiku sira ba setór ne'e, hodi tau iha konsiderasaun la'ós de'it rekomendasaun internasionál sira ne'ebé aponta ba alokasaun mínima ida hamutuk 15% husi Orsamentu Jerál Estadu nian ba Ministériu Edukasaun nian, maibé mós iha dimensaun husi Ministériu ida ne'ebé iha unidade 30 no funsionáriu na'in 16.000 buka atu, tinan-tinan hatán ba universu populasionál joven rihun 700 ho idade menus husi tinan 24, besik 60% husi populusaun totál Timor-Leste nian.

Maske ho ida ne'e, Governu atuál hatene momoos katak aumentu ba alokasaun anuál la to'o atu rezolve problema sira ne'ebé mai nafatin no kle'an tebes ne'ebé maka nasaun ne'e hasoru iha área Edukasaun nian. Medida ida-ne'e sei presiza la'o hamutuk ho estratéjia ida ne'ebé klaru no loloos ne'ebé orienta ba implementasaun husi prinsípiu no objetivu setoriál sira ne'ebé estabesele tiha ona iha polítiku-jurídiku nasional sira liu husi asaun hamutuk husi hotu-hotu ne'ebé halo parte ba comunidade edukativa.

Señora no señor sira,

Edukasaun, nu'udar prioridade nasional, representa mós responsabilidade kolektiva ida iha ne'ebé envolvimentu husi sira hotu ne'ebé maka halo parte ba comunidade edukativa sai nu'udar buat ida ne'ebé fundamentál. Bainhira ko'alia kona-ba comunidade edukativa inklui naturalmente setór privadu ne'ebé iha mós responsabilidade sosiál balun iha área ida-ne'e. Setór privadu dezempeña papél ida ne'ebé krusiál iha dezvoltamentu nasional no tanba ne'e, presiza envolve maka'as liután setór ne'e ho forma ne'ebé estimula no konsistente iha estratéjia nasional sira ne'ebé adota iha setór Edukasaun nian.

Importante atu dezvoltave mekanizmu ne'ebé efikás kona-ba ligasaun entre institusaun sira ensinu superiór nian no empreza sira, hodi apela ba diálogu no ba interasaun kontínua entre parte rua ne'e, liuliu, hodi buka atu formasaun ne'ebé ensinu superiór sira nian hatán duni ba nesidade réal sira merkadu serbisu nian; hodi estebelese akordu entre empreza privada sira ho universidade no institutu superiór tékniku sira atu nune'e bele fó apoiu ba estajiáriu sira durante kontratasaun joven sira ne'ebé buka empregu dahuluk nian.

Hanesan ita hahú hodi hateten, Governu Konstitusionál VII asume iha ninia knaar tomak Edukasaun hanesan prioridade nasional, tanba hafoin tinan 15 Restaurasaun Independénsia Nasionál, ita hatene momoos katak edukasaun maka sai nu'udar baze ba afirmasaun identidade Timor-Leste nian iha rejiaun no iha mundu, no nu'udar elementu propulsór ida ne'ebé labelle ignora husi dezvoltamentu nasional.

Ha'u halo konkluziun hodi foti sira seluk nia lia-fuan, tambabele habadak ha'unia intervensaun badak ida-ne'e, no ha'u kalkula katak nu'udar parte husi imi-nia prezensa sira iha semináriu ne'e; "Sira ne'ebé maka hatete katak Edukasaun ne'e folin aas lahatene folin hira maka nasaun sira selu tamba falta Edukasaun". La iha tan buat seluk maka loos liután fali ida ne'e. Ha'u hakfodak bainhira hatene kona-ba ida ne'e.

Obrigado barak.